

**МЕСЯЦА АВГУСТА В ДЕНЬ 24
ПРЕПОДОБНОМУЧЕНИКА СЕРАФИМА (ШАХМУТЯ),
АРХИМАНДРИТА ЖИРОВИЦКАГО¹**

Аще изволит настоятель, творим бдение

НА МАЛОЙ ВЕЧЕРНИ

На Господи, воззвах: **стихиры на 4, глас 1:**

Мира сего суетная отверг,/ подвиги духовныя понесл еси, отче,/ во обители Жировицкой послушанию навык,/ и оттуду светильник верным показался еси,/ ко спасению вечному православныя люди приводя./ Поругания и темницу от безбожных претерпев,/ смерть за Христа Спаса прияти не уstraшилсЯ еси./ Егоже моли прощение грехов всем нам даровати// и велию милость душам нашим. *(дважды)*

Богомудре отче Серафиме,/ очервленными твоея крове/ священную одежду украсил еси,/ от силы бо благочестно в силу,/ и от славы в славу Божественную/ радуясЯ прешел еси,/ и ныне молисЯ даровати душам нашим// мир и велию милость.

Жертву первее Богу принося безкровную,/ яко священник законный,/ богоглаголиве всечестне,/ послежде яко всеплодие и жертву приятну,/ себе самого кровию,/ яко мученик истиннейший/ Христу принесл еси,// Егоже моли о поющих тя.

Слава, и ныне: Богородичен, глас тойже: Радуйся, Богородице Дево:

Аще же в храме Успения, глас тойже:

Жизни Вышняя желаючи,/ сию оставила еси, Богородительнице Отроковице,/ девства цвете,/ Христа рождшая, всех Живота;/ благоговейно предстояше апостольский собор// честному Твоему погребению, Богоневестная.

На стиховне стихиры, глас 2.

Подобен: Доме Евфрафов:

Весь Жировицкая,/ обитель святая,/ украшай твой дом,/ в немже архимандрита Серафима// дивный во святых Господь прослави.

Стих: Честна пред Господем/ смерть преподобных Его.

Церковь Белорусская,/ красуйся и ликуй,/ се бо Серафим Жировицкий/ с сонмом новомучеников// предстоит престолу Господню.

Стих: Блажен муж бояйсЯ Господа, в заповедех Его восхождет зело.

¹ Тексты, заимствованные из служб Успению Пресвятой Богородице и Жировицкой иконе Богоматери, напечатаны более мелким шрифтом.

Соборе новомучеников Белорусских,/ полче Божественный,/ молитесь ко Господу/ о земном Отечестве вашем// и о почитающих вас любовью.

Слава, глас и подобен тойже:

Новый доме Евфрафов,/ уделе избранный,/ Русь Святая,/ храни веру православную,// в нейже тебе утверждение.

И ныне, Успению, глас и подобен тойже:

Двери Небесныя,/ возмיתесь,/ зряще дверь Вышняго,/ идущу со славою// к Сыну и Богу.

Тропарь, глас 2:

Пламенем веры разжегся,/ светильник явился еси Белорусской Церкви,/ возсиявый во обители Жировицкой,/ яко пастырь добрый/ верныя ко спасению наставивый,/ душу свою за Христа положивый,/ преподобномучениче Серафиме,// моли о нас Всещедраго Бога.

Слава, и ныне: Жировицкой иконе, глас тойже:

Помощи от Тебе требующия не презри, Владычице,/ и милосердия бездну отверзи всем,/ притекающим к цельбоносней иконе Твоей./ Печали наша житейския утоли, Всещедрая,/ и от юдоли сея плачевныя/ к радости вечней верныя Твоя прости: Тебе бо вси стяжахом надежду и утверждение,// милости источник, покров и спасение душ наших.

НА ВЕЛИЦЕЙ ВЕЧЕРНИ

Блажен муж: 1-й антифон.

На Господи, возвах: стихиры на 8, глас 6:

По имени твоему тако и житие твое,/ преподобномучениче Серафиме:/ огненною бо ревностию яже по Бозе/ уподобился еси пророком Илии и Крестителю,/ Исаии и трием отроком,/ и славным древним и новым мучеником,/ с нимиже молися за обитель и люди,// совершающая память твою. (дважды)

Отче Серафиме прехвальне,/ достойнейший послушнике Божия Матере,/ в уделе Ея на Белой Руси,/ во обители Жировицкой/ крест свой на рамо восприим,/ со славою понесл еси даже до смерти,/ молися прилежно к Небесней Игумении нашей/ за обитель и братию,// совершающую память твою. (дважды)

Егда приспе время/ послужити тебе вне обители/ во трудах благовестнических,/ за послушание с радостью текл еси на предлежащий подвиг,/ непрестанно воспевая/ яко свидетель Христов:// повем имя Твое братии моей.

Твердостью адаманту подобный,/ делатель добрый явился еси в

винограднице Христовом,/ во Святей Церкви,/ юже наемницы сатанинстии тщася разорити/ и людей православных конечно истребити,/ ты же, святе Серафиме, взывал еси:/ Церковь Христова пребудет до скончания века,/ юже никтоже в мире сокрушити может,// основана бо есть на Камени Христе.

Серафиме отче наш,/ благодатию священства почтен,/ Безкровную Жертву приносил еси о всех и за вся/ и сам яко жертва непорочная/ мученическою своею кровию/ принеслся еси Богу,/ и с лики святых в неизреченном Свете пребываеши// и молишися о душах наших.

Любовию спасайтесь, братие,/ любовию яже к Богу и ближнему,/ любовию даже до смерти за други своя,/ и не посрамлены будете ни в сем веце, ни в будущем,// якоже Серафим Жировицкий.

Слава, глас 8:

Радуйся, земле Белорусская,/ красуйся и ликуй, обитель Жировицкая,/ воспой, местечко Ляховичи,/ торжествуйте, грады и веси,/ пределы земли Минския и Слуцкия,/ Могилевския и Витебския,/ Гомельския и Гродненския,/ яко ваш великий молитвенник и заступник,/ Серафим Жировицкий,// днесь прославляется Господем.

И ныне: Богородичен, глас тойже: Царь Небесный:

Аще же в храме Успения, глас тойже:

Уверяя Иисус, Сын Твой, Богородице, и Бог наш/ два естества Своя,/ яко убо человек умирает/ и якоже Бог востает./ И Ты, Богомати, законом естества умрети благоизволи,/ да не неверным привидение мнится смотрение,/ прешла бо еси к Небесней стране, Небесная Невесто,/ яко от чертога селения Твоего от земли взята./ Освятися воздух восхождением Твоим,/ яко просветися земля рождением Твоим,/ предпосылают апостолы, и Ангели подъемлют./ Темже, погребше пречистое тело Твое/ и надгробное пение воспевше,/ ужасно зряху и со страхом глаголаху:/ сия измена десницы Вышняго,/ Той бо посреди Тебе, и не подвижешися./ Но, о Многопетая Мати,/ не отступай, нас называющи:/ мы бо людие Твой и овцы пажити Твоя,/ и имя Твое призываем,/ просяще Тебе ради спасения и велия милости.

Вход. Прокимен дне.

Чтения 3 мученическая.

На литии стихира храма.

Слава, глас 1.

Подобен: О, дивное чудо:

О, дивное чудо!/ Обитель Жировицкая/ враги обстоима бяше,/ и невреждена даже доныне пребывает./ Веселитесь, Жировичи,/ Богородичен святой доме./ Возопиим, вернии,/ святого Серафима

имуще предстателя:/ Преподобне отче, радуйся,/ тобою Господь//
подает нам помощь и велию милость.

И ныне, Успению, самоподобен:

О, дивное чудо!/ Источник Жизни/ во гробе полагается,/ и лестница к Небеси
гроб бывает./ Веселися, Гефсимание,/ Богородичен святой доме./ Возопиим,
вернии,/ Гавриила имуще чиновачальника:/ Благодатная, радуйся,/ с Тобою
Господь,// подай миру Тобою велию милость.

На стиховне стихиры, глас 2.

Подобен: Доме Евфрафов:

Весь Жировицкая,/ обитель святая,/ украшай твой дом,/ в немже
архимандрита Серафима// дивный во святых Господь прослави.

Стих: Честна пред Господем/ смерть преподобных Его.

Церковь Белорусская,/ красуйся и ликуй,/ се бо Серафим
Жировицкий/ с сонмом новомучеников// предстоит престолу
Господню.

Стих: Блажен муж бояйся Господа, в заповедех Его восхощет зело.

Соборе новомучеников Белорусских,/ полче Божественный,/
молитесь ко Господу/ о земном Отечестве вашем// и о почитающих вас
любовию.

Слава, глас и подобен тойже:

Новый доме Евфрафов,/ уделе избранный,/ Русь Святая,/ храни
веру православную,// в нейже тебе утверждение.

И ныне: Богородичен, глас тойже: Все упование мое:

Аще же в храме Успения, глас и подобен тойже:

Двери Небесныя,/ возмися,/ зряще дверь Вышняго,/ идущу со славою// к
Сыну и Богу.

**По Ныне отпускаеши: на благословении хлебов тропарь святого
дважды и Богородице Дево: единожды.**

Тропарь, глас 2:

Пламенем веры разжегся,/ светильник явился еси Белорусской
Церкви,/ возсиявый во обители Жировицкой,/ яко пастырь добрый/
верныя ко спасению наставивый,/ душу свою за Христа положивый,/
преподобномучениче Серафиме,// моли о нас Всещедраго Бога.

НА УТРЕНИ

На Бог Господь: тропарь святого дважды, глас 2.

Слава, и ныне: Богородичен: Вся паче смысла:

По 1-м стихословии седален, глас 4:

Земных и тлеющих наслаждения небрегл еси, отче Серафиме,/ и житие иноческое возлюбил еси,/ мира красоту и пищу временную возненавидел еси,/ и отсюда сподобился еси мученическому и постническому сочетатися ликом:// с нимиже моли спастися нам.

Слава, и ныне: Богородичен:

Торжествует днесь обитель Жировицкая,/ совершаючи празднество святого архимандрита Серафима/ на месте, идеже явился чудотворная икона Божия Матере,/ идеже и доныне обильно изливается благодать Божия,/ братию в духовных подвизех укрепляючи,/ благочестивых юношей в богомыслии умудряючи// и всем христианом во всякой нужде помогаючи.

По 2-м стихословии седален, глас 6:

Преподобне отче Серафиме,/ во Святем Крещении Романом наречен был еси,/ темже Сладкопевцу подражая,/ выну воспевал еси Богу во псалмех и пении и песнях духовных,/ яже на молитву и покаяние нас подвизают,// и из сердец окамененных источают слезы.

Слава, и ныне: Богородичен:

Сошедшися ныне во обитель Жировицкую,/ сотворим молитву, празднлюбцы,/ со слезами пред дивно явленной иконою Богородицы поюще:/ приими, Владычице, моления наша/ и принеси их Твоему Сыну и Богу,// да спасет Тобою души наша.

Величание

Ублажаем тя,/ преподобномучениче Серафиме,/ и чтим святую память твою,/ наставниче монахов// и собеседниче Ангелов.

Псалом избранный

1. Терпя потерпех Господа, и внят ми, и услыша молитву мою. Ублажаем...

2. Благовестих правду в Церкви велицей.

1. Истину Твою и спасение Твое рех.

2. Повем Имя Твое братии моей, посреде Церкви воспою Тя.

И прочия стихи, елики еклисиарх разсудит.

По полиелеи седален, глас 8:

Радуйся и ликуй, уделе Божия Матере,/ славная обитель Жировицкая,/ се бо дивный во святых Своих Господь/ дарова тебе

новаго заступника и молитвенника,/ всечестнаго архимандрита Серафима,// апостолом и мучеником единоправнаго.

Слава, и ныне: Богородичен:

Днесь торжествует светло обитель Жировицкая,/ прославляющи Матерь Божию, место сие освятившую/ и образ Свой, яко дар многоценный, людем оставившую./ Припадем убо, вернии, к честней иконе Владычицы:/ дарует бо верным освящение/ и укрепляет сердца малодушная,// в жизнь вечную приводящи.

Степенна, 1-й антифон 4 гласа: От юности моея: Прокимен, глас 4-й: Честна пред Господем/ смерть преподобных Его. Стих: Что воздам Господеву о всех, яже воздаде ми. Всякое дыхание: Евангелие от Марка, зач. 37.

По 50-м псалме стихира, глас 6-й:

Преподобне отче Серафиме,/ во всю землю Белорусскую изыде вещание исправлений твоих:/ тем на небесех обрел еси мзду трудов твоих,/ демонския погубил еси полки,/ и ангельския достигл еси чины,/ ихже житию непорочно поревновал еси,/ и мученическим венцем украсился еси,/ дерзновение имея ко Христу Богу,// мир испроси душам нашим.

Канон Пресвятыя Богородицы, явления ради Ея иконы Жировицкия, на 6 (со ирмосом), глас 4, и святаго на 8, глас 8, егоже краегранесие:

Моли Бога о нас, мучениче отче Серафиме.

Песнь 1

***Ирмос:** Отверзу уста моя,/ и наполнятся Духа,/ и слово отрыгну Царице Матери,/ и явлюся, светло торжествуя,// и воспою, радуясь, Тоя чудеса.*

В Тя, одушевленный чертоже, Бог вселися/ и, чрез Тебе прошед, явися Спас мира Господь,/ темже Тя, Богородице, воистинну величаем.

Ты еси, Мати Божия, миру предстательница, молим Тя, Дево:/ прости руце свои богоноснии к Сыну Твоему Божественному, о нас умоляющи,/ да помилует люди Своя погибающия.

Госпоже Пречистая, Мати Божия, Помощнице наша всеильная,/ Ты [бо]² к Тебе прибегающим милость чрез иконы цельбоносныя даруеши,/ и ныне Тя молим, Пречистая:/ освяти нас иконою Твоею чудотворною,/ юже в обители Жировицкой прославила еси.

Кто Тебе не ублажит, Пресвятая Дево?/ Ангельский собор и человеческий род по долгу Тя прославляет:/ Тебе бо ради Христос в мир явися,/ Егоже прославляюще,

² Стоящее здесь в печатной Минее слово "бо" является лишним.

Тя величаем.

И святого

Ирмос: Воду прошел:

Многими содержимь напастьми,/ к тебе, преподобномучениче
Серафиме, прибегаю,/ помощи и утешения иский,/ предстательством
твоим у Владыки Христа ты ми помози.

Омрачения душевного и телесных недугов/ умоли Господа
избавити нас, святче Божий,/ пламенный именем и житием.

Слава: Лености сон оттрясше,/ усердно прославим Христа
Жизнодавца,/ даровавшего нам дивного заступника/ и помощника
неусыпного.

И ныне: Игумение Небесная обители Жировицкия,/
Преблагословенная Владычице,/ укрепи нас в подвиге послушания.

Песнь 3

Ирмос: Твоя песнословцы, Богородице,/ живой и независтный
Источниче,/ лик себе совокупльшия, духовно утверди,/ в божественней
Твоей славе// венцев славы сподоби.

Ты еси Одигитрия, Девице, Путеводительница наша,/ не остави люди, Ты
возлюбившии,/ но присно руководи,/ чрез море житейское препровождающи в
Царство Превечного Сына Твоего.

Мати роду человеческому изволила еси быти, Пречистая,/ темже мы, яко чада
неутешная, к Тебе, Заступнице рода христианского, усердно прибегаем:/ не остави
нас сирых, Владычице,/ но скоро простри руку Свою благодеющую,/ изымающую
ны от тины греховныя,/ утверждающи на пути покаяния.

Звездо пресветлая, Богородице,/ иконами чудотворными мир озарившая,/
просвети наш разум, грехми помраченный,/ и даруй нам славити Тя во веки.

Днесь, вернии, любовию совокупльшиися, Матерь Божию прославим,/
проповедующе чудеса Ея, от иконы Жировицкия явленная, и Спасу вопием:/
приими молитвы рождшия Тя Богородицы/ и спаси души наша.

Святого

Ирмос: Небесного круга:

Болезни и обстояния в житии своем терпеливо понесый,/ отче
Серафиме,/ очистился еси, яко злато в горниле.

Обители Жировицкия инок был еси,/ от мирского мятежа
удалився,/ и нам на всяком месте нелицемерно/ Господеви угодити
сподоби.

Слава: Горькаго угрызения змиева/ и искушений губительных,/
избави нас, Сердцеведче Господи,/ молитвами Серафима угодника.

И ныне: Аще и прогневаем Бога ежечасно,/ но не отступаем
конечне;/ Пресвятая Богородице,/ управи нас на стези покаяния.

Седален, глас 3

Преподобномученик Серафим днесь предстоит престолу Агнца/ и с Пречистою Девою Игумениею Жировицкою,/ и со Ангелы и всеми святыми восклицает дерзновенно:/ благословение, и слава, и премудрость,/ и хвала, и честь, и сила, и крепость нашему Богу// во веки веков. Аминь.

Слава, и ныне: Богородичен:

Пророцы проповедаша,/ апостоли научиша,/ мученицы исповедаша,/ и мы вероухом/ Богородицу Тя воистинну сущую:/ темже и величаем// Рождество Твое, Пречистая.

Песнь 4

Ирмос: Седяй в славе на престоле божества/ во облаце легце,/ прииде Иисус пребожественный/ нетленною дланию и спасе зовущия:// слава, Христе, силе Твоей.

Ныне славит православных людей множество чудеса Твоя, Богородице,/ землю [бо]³ Русскую нам озарившая/ и свет Православия утвердившая.

Купино Неопалимая,/ образ Свой во огни неврежденно сохраняя,/ попали скверну душ наших,/ ко святей иконе Твоей с верою прибегающих.

Ты, Владычице, икону Свою паки даровала еси/ на камени велицем во обители Жировицкой,/ назнаменуя нам путь спасения на камени веры - Христе.

Днесь Ангелы и человецы песнь Господеви воспевают,/ славяще Пречистую Деву Богородицу.

Святаго.

Ирмос: Услышах, Господи:

Обуревания страстей и смущения помыслов/ умоли Господа избавити нас/, отче Серафиме,/ и небеснаго покоя достигнути.

Не имамы зде пребывающаго града,/ но грядущаго взыскуем,/ - со апостолом глагола еси выну,/ Серафиме благовестниче.

Слава: Ангеле земный и небесный человеце,/ Серафиме отче наш,/ наставляй нас к тихому пристанищу.

И ныне: Славнейшую без сравнения Серафим/ и Честнейшую Херувим и Горних Воинств,/ сущую Богородицу возвеличим, вернии, в песнех.

Песнь 5

Ирмос: Ужасошася всяческая/ о божественной славе Твоей:/ Ты бо, неискусобрачная Дево,/ имела еси во утробе над всеми Бога/ и родила еси безлетнаго Сына,/ всем воспевающим Тя// мир подавающая.

Приидите, вернии, ко кладязю милостей Божия Матере,/ всех нас покровом

³ Стоящее здесь в печатной Минее слово "бо" является лишним.

Своим покрывающая/ и о спасении нашем Христа умоляющая.

Кто исповесть чудеса Твоя, Богородительнице?/ Даруешь бо верным милости богатыя/ и исцеляешь недуги душевные и телесные.

Вси, притекающие с верою к цельбоносному образу Твоему, Дево,/ приемлют освящение и помощь в напастех, на ны находящих.

Радуйся, обитель Жировицкая, сокровище великое zde хранящая,/ покров невидимый, свет немеркнущий/ образ Чистой Богородицы.

Святого.

Ирмос: Просвети нас повелением:

Мраком душевным одержими,/ к тебе, отче Серафиме, вопием,/ помози нам преити безбедно к Невечернему Свету.

Узрев страждущую паству,/ блуждающую яко в пустыни,/ явился еси для них светильник веры и благочестия.

Слава: Чертог Твой, Спасе, вижу украшенный/ и не имам брачныя одежды,/ стыжуся наготы греховныя,/ но пощади мя молитвами святого Серафима.

И ныне: Елеем милости, Премилосердная Владычице,/ всерадостное Заступление,/ исцели моя греховныя струпы.

Песнь 6

Ирмос: *Божественное сие и всечестное/ совершающее празднество,/ богомудрии, Богоматере,/ приидите, руками воспоем, от Ней рождшагося Бога славим.*

Ликуйте, иноцы,/ днесь бо Небесная Игумения обители Жировицкия прославляется,/ днесь бо богатыя милости изливаются от иконы Преславныя Богородицы.

Ты еси Наставнице целомудрия,/ Ты еси Училище благочестия,/ Ты еси любви неистощимый Источник,/ святой образ нам явившая.

Облагодати наш ум,/ низу преклоншийся, Дево Пречистая Богородице,/ Ты ныне радостно славящих.

Воспойте, вернии, песнь Божественную,/ славяще Матерь Божию,/ Христа всему миру родившую.

Святого.

Ирмос: Молитву пролию ко Господу:

Ниневитяны в покаянии помилова/ и Иону из чрева китова избави,/ и всем хочет вечнаго спасения Господь,/ Егоже молит о нас Серафим Жировицкий.

Илии пророку ревностию подражая,/ не угождал еси духу времени,/ но безбоязненно, святе Серафиме, всякому/ проповедал еси вечныя глаголы.

Слава: Чашу мучения до конца испил еси,/ благодаря Господа,/ сподобившаго тя равноапостольно/ послужити благовестию Евангелия.

И ныне: Еяже иконою обитель Жировицкая славится,/ Пречистая Богомати/ Стена есть Нерушимая православных жительству.

Кондак, глас 2:

Яко благовестником Христовым соревнителя,/ и послушника Божия Матере вернаго,/ и страдальца за Церковь Божию честнаго,/ в песнях воспоим архимандрита Серафима приснохвальнаго:// той бо змия поправил есть.

Икос: Страстем Господним поревновав, преблаженне/ за Того умрети возжелел еси,/ леств безбожнаго суетства разорил еси,/ мужески подвигся противу врагов,/ тех злохитрственная ловления и козни низложил еси,/ и венец почести приял еси достойно,/ преподобне страдальче./ Тем тя яко новаго молитвенника,/ почитаем, преподобномучениче Серафиме,/ обители Жировицкия похвало/ и всея Белорусския земли украшение:// ты бо змия поправил еси.

Песнь 7

Ирмос: *Не послужиша твари богумудрии/ паче Создавшаго,/ но, огненное прещение мужески поправше,/ радовахуся, поюще:// препетый отцев Господь и Бог, благословен еси.*

Осуши слезы скорбных, Радосте наша Богородице,/ к Тебе с верою приходящих,/ и даруй нам помощь великую.

Не остави, Пречистая, туне рабов Твоих,/ к честней иконе Твоей со страхом припадающих,/ и умоли о нас Всесильнаго Бога нашего,/ да дарует милость в День судный.

Образ Твой святой прославляюще, радуемся, Владычице,/ Помоще наша и Стено Нерушимая/ всех, с верою к Тебе прибегающих.

О Тебе радуемся и Тя прославляем, Дево Пречистая,/ яко Невместимаго вместила еси,/ Егоже присно моли о спасении нашем.

Святаго.

Ирмос: От Иудеи дошедше отроцы:

Обитель Жировицкую оставил еси, отче, за послушание,/ в годину лютых испытаний,/ и явился еси Белорусской Церкви благовестник и свидетель.

Твердостью веры, отче Серафиме,/ сокрушил еси зубы врагов,/ и слезами умиления/ погасил еси пламень страстный.

Слава: Чаяй Воскресения со святыми,/ Серафим Жировицкий/ не

убояся огненного искушения.

И ныне: Егда оскудеет во мне благочестие/ и бесплодную смоковницу соделается сердце,/ излей ми росу милости,/ и оживи мя, Мати Дево.

Песнь 8

Ирмос: *Отроки благочестивыя в пещи/ Рождество Богородичо спасло есть:/ тогда убо образуемое,/ ныне же действуемое,/ вселенную всю воздвигает пети Тебе:/ Господа пойте, дела,// и превозносите Его во вся веки.*

Киими песньми прославим Богородицу,/ дары нам великия подающую,/ чудодейственным бо образом Своим подвизает нас к пению:/ Господа пойте, дела,/ и превозносите во вся веки.

О, безчисленное чудес множество роду христианскому явившая/ и милости Своя неоскудно источающая,/ тем Тя поем во вся веки.

Якоже отроцы неопалими в пещи явишася,/ тако девство в рождестве сохранила еси, Пречистая Дево Богородице,/ тем Тя поем во вся веки.

Христа славословим, мира Спасителя,/ и Деву Пречистую славим,/ яко воистинну Богородицу.

Святаго.

Ирмос: Царя Небеснаго:

Слово Божие не вяжется,/ разумеите, безумнии, и умудритесь,/ зряще прославление Серафима Жировицкаго/ с сонмом новомучеников.

Еже ми жити - Христос,/ и еже умерети - приобретение,/ мучениче славне,/ воистинну показал еси.

Благословим Отца и Сына и Святаго Духа, Господа.

Радуйся, светильниче пресветлый,/ егоже постави Господь верху горы,/ да светиши верным и научаеши/ прославляти Отца Небеснаго.

И ныне: **А**ще и родила еси Сына,/ но пребыла еси Дева,/ якоже и отроцы неопалими огнем/ в пещи Вавилонстей явишася.

Песнь 9

Ирмос: *Всяк земнородный/ да възиграется, духом просвещаемь,/ да торжествует же безплотных умов естество,/ почитающее священное торжество Богоматере,/ и да вопиет:/ радуйся, всеблаженная Богородице,// Чистая Приснодево.*

Премилосердная Владычице,/ приими молитвы всех, Тя ныне славящих и образ Твой чествующих,/ даруй всем оставление прегрешений многих.

Приими нас, поющих Тебе, Дево,/ и к образу Твоему, яко к знамению милости Твоея, притекающих,/ и даруй рабом Твоим милости превеликия.

Облагоухай нас, многогрешных, Владычице, смраду греховному причастных,/ изми нас из пропасти погибельных,/ утвердивши во благочестии.

Спасе мира и Господи, приими песнь радостную,/ дал бо еси людям Заступницу,/ Юже величающе, Тя присно славим.

Святаго.

Ирмос: Воистинну Богородицу:

Фарисейскаго высокоумия избег, отче Серафиме,/ смирением исполнил еси душу,/ и нам помози познати/ глубину грехов своих.

Иерусалима новаго жителю,/ настави нас, во странствии сущих,/ не уклоняться в развращения,/ но взыскати Царствия Небеснаго.

Слава: Многими словесы невозможно есть/ восхвалити подвиги угодника дивнаго,/ емуже подражати, Господи, нас сподоби.

И ныне: Елицы в послушании Божия Матере неленостно работают,/ не потеряют мзды своя,/ показывает нам Серафим Жировицкий.

Светилен:

Обитель явился еси Духа Пресвятаго, отче Серафиме,/ подвиги иноческими просияв/ и мученическим венцем украсився,/ о нас непрестанно моли,/ почитающих твою память верою и любовию.

Слава, и ныне: Богородичен:

Спаси от бед рабы Твоя, Премилосердная Владычице,/ яко мы усердно к Тебе во обители Жировицкой прибегаем,/ яко к нерушимой стене и предстательству,/ скорой Помощнице и Ходатаице жизни вечныя.

На хвалитех стихиры на 4, глас 4:

Предстаните нам, почившая братия обители Жировицкия,/ и рцыте со дерзновением нам,/ коликих чудес Пречистыя Богоматере/ вы бысте свидетелие,/ яко, Богу споспешествуящу,/ подвиги вашими победили есте врага/ и тесным и тернистым путем// вошли есте в Небесныя Обители.

Древняя обитель Жировицкая,/ простотою и смирением известная,/ многия управила есть ко спасению:/ zde во трудах и исповедничестве просияша/ святителие Христовы/ Ермоген иже в Тоболах,/ Александр Харьковский,// и славный Петр Крутицкий.

Иноцы Жировицтии,/ вернии делателие винограда Христова/ и Всецарицы Богоматере/ чистотою украшении,/ Серафим небоязненный благовестник,/ и соработницы его,/ и инии мнозии, ведомии и неведомии,// достойно да ублажаются.

Не мните суетно, братие,/ яко место приблизит нас к Богу,/ ибо на

всяком месте/ исполняяй волю Божию приятен есть/ и не погубит мзды своея,/ якоже Серафим Жировицкий,/ в безвестном месте за Христа убиенный// и вечную славу наследивый.

Слава, глас 6:

Жировицкая обитель,/ издревле славная чудесы иконы Богоматерни,/ многия иноки Богови воспита./ Тамо и преподобный Серафим/ подвигом добрым подвизася,/ чудную Богоматерь славя,/ и, прием благословение Пречистыя,/ обтекаше пределы Белорусския,/ верныя укрепляя,/ заблуждшыя вразумляя,/ храмы Божии из мерзости запустения возставляя./ Темже и мученичества венец/ по мнозех трудах пастырства своего доблестне прият./ Сего ради воспоим, людие, Христа Бога/ и Пречистую Его Матерь возблагодарим,/ яко имамы преподобномученика славна// и молитвенника о душах наших достоблаженна.

И ныне: Богородичен, глас тойже: Богородице, Ты еси лоза истинная,/ возрастившая нам плод живота,/ Тебе молимся/ молися Владычице, с преподобным Серафимом/ и со святыми апостолы,// помиловаться душам нашим.

Аще же в храме Успения, глас тойже:

На безсмертное Твое успение,/ Богородице, Мати Живота,/ облацы апостолы по воздуху восхизаху,/ и, по миру разсеянные,/ во едином лице предстаху пресвятому Твоему телу,/ еже и погребше честно,/ глас Тебе Гавриил поюще, вопияху:/ радуйся, Благодатная Дево,/ Мати Безневестная,/ Господь с Тобою./ С нимиже, яко Сына Твоего и Бога нашего, моли// спастися душам нашим.

Славословие великое.

По Трисвятом тропарь святого, Слава, и ныне: Богородичен.

НА ЛИТУРГИИ

Блаженна от канона святого, песнь 3-я и 6-я, на 8. Прокимен, глас 7: Восхвалятся преподобнии во славе,/ и возрадуются на ложах своих. Стих: Воспойте Господеву песнь нову, хваление Его в церкви преподобных. Апостол к Тимофею, зач. 291. Аллилуия, глас 6: Блажен муж, бояйся Господа, в заповедех Его восхощет зело. Стих: Сильно на земли будет семя его. Евангелие от Матфея, зач. 36. Причастен: В память вечную будет праведник,/ от слуха зла не убоится.

Молитва

О, пречудный угодниче Христов, святыи преподобномучениче

Серафиме, обители Жировицкия похвало и Церкви Белорусския украшение! Приими сие малое моление от нас, грешных и обремененных страстями многими, к твоему теплому предстательству усердно прибегающих.

Испроси у Всещедрого Бога Церкви Святей, Соборней и Апостольстей мир и тишину, архипастырем и пастырем мудрость и ревность к славе Божией, иночествующим в подвизех послушания, молитвы и поста укрепление, учащим и учащимся в богомыслии деятельное возрастание и всем чадом церковным в вере и благочестии преуспеяние.

Страну нашу, грады и веси ея, ихже прошел еси в годину тяжких испытаний, огради молитвами твоими от огня, потопа, труса, глада, вражескаго нашествия и внутренних нестроений.

О, исповедниче Христов! Яко имеяй дерзновение к Божией Матери, от лет древних весь Жировицкую в удел Себе избравшей, молися прилежно к Небесней Игумении нашей, да сохранит обитель сию невредиму от всех навет вражиих даже до скончания века.

Егда же приспее час кончины нашея, помози нам в твердости духа и чистой совести предстати пред Господем и, сподобившися деснаго предстояния со всеми святыми, убелившими ризы своя в Крови Агнчей, новую песнь воспети в Троице славимому Богу, Отцу и Сыну и Святому Духу, во веки веков. Аминь.